

續修陝西省通志稿

第一百十二冊

卷二百十一

續修陝西通志稿卷二百十一

文徵十一

徵述三

李符六軼事

鄭士範

鳳翔

李符六先生廷獻強樂菴姻家也樂菴將適邵先子就謀西席時先生甫卸咸陽教諭家居遂薦之慮其不就先子曰是在余誠懇也親往敦延御李以歸遂成莫逆範從樂菴學作文然尖圍多圓圍少先生見意真機暢即獎借之使人興高而文思銳進然必教之重躬行務實學以爲似若之年舉甲乙科入翰苑者豈少也哉古人以少年登科爲不幸我不願爾輩之速成也惟進學之年須早爲好致力讀書耳故先子命範兄弟以事樂菴者事先生早起問安灑洒室中拂案塵然後退先生免之令趣讀書判文之暇每

留先子挑燈夜話言壬子入都嘗謁韓城王文端公見案頭惟張
說傳又言有吳刀子者官知縣父死丁憂恨極以頭撞尸畫紙製
蟒袍補服斂之故爾時譏知縣乃酆都城餓鬼化身莊諧並語以
相笑樂先生性剛疾惡尤嚴嘗述與咸陽汪令交惡驛中飼馬取
麪房麩子有麪房代求令免不許先生怒揭其私取粟船稅布政
司朱親來察訊鞭其門役奪稅歸公令爲先生年家子後染疫垂
危家人曰李老師非宿怨者也延之診視爲處一方一醫而愈此
則余聞於程棫者也是冬府試範兄弟未列前茅先生滋不懌課
益嚴日出四書文二律詩一晡時完卷里門演劇士楷卷未完而
出呼歸扶之無何以炭火悶床病矣輿歸不起範時遊庠猶得床
前一見悲夫先子待先生忠且敬以厨室遠羹饌易寒爲之置火
盥夜呼僮不應親取溺器先生亦極重先子贈之別字號輯五又

手書文端鐵鑪銅硯歌示範中有直與彝鼎偕尊崇之句則期望亦甚奢矣範見樂菴書問先生良知之學答辭剖辨要以衷聖爲主其作字雖小楷亦懸腕墓表見虛受堂稿原名廷琇後改今名畧述軼事猶想見先生東面先子西面絳燭白髮寒宵把酒共話時情事也

大學生清廉黃君墓志銘

何玉藻 寶雞

君太學生諱潔字清廉寶雞黃氏右族也父祖以上皆力田君幼慧讀書異凡兒以貧故棄儒而賈非其好也然有餘資即向坊肆中購書漸積多種嘗曰吾以顙領不獲卒讀其貽諸子孫以償吾願乎又曰貨殖傳中人能贍家而不能大門戶設啟後無法不將銅臭笑人乎尋子元吉生雖愛憐曲至而教督綦嚴甫識之無即爲延名師或令負笈出外覓良師友就傳稍遲呵斥之不少貸且

儆之曰若不勤讀須是自謀水火吾不能常爲若作廝養也自是元吉讀益力試輒冠其曹人以爲義方之報云後課孫鏞亦如其教子故鏞亦有聲庠序惜子不永年孫之妙年獲衿君又不及見知君者咸歎惋焉然經香仍世黃氏門戶果大矣謂非君貽謀之善哉其他篤友于樂調教俱詳余所爲墓表中不贅也君配張氏生子一元吉邑增生孫一鏞郡庠生女二適高適王孫女二曾孫女二人乾隆辛酉六月十六日生嘉慶壬戌八月三日卒葬村西祖塋道光丁未十月二十五日也銘曰

古有鄴侯好擁書城古有象山好讀書聲君雖居肆而心則儀乎前型以宜爾子孫以光爾門庭表茲元石永無墜乎令名

廣西懷集縣知縣容南池先生墓志銘

何玉藻

先生姓容諱昂字明甫號南池世居寶雞縣仁和里曾祖某西鄉

訓導祖某舉孝子父萬育妣氏袁均贈如例有子四季即先生幼誠篤言動不苟從世父讀書西和學署世父鍾愛之比長學益力補博士弟子員當是時家窘甚先生晝出治田夜篝燈莊誦精舉業外研究身心性命之學深有體認中嘉慶辛酉第十名舉人已成進士廷試後第仍歸里訓課子姪時食指繁先生以舌代耕卒能使俯仰無缺婚喪賓祭悉如禮辛未主本邑金臺書院講席教士有法獲雋者衆尋移硯潼關又掌教隴州隴乏科名數十年矣先生循循啟誘張君淳雅登賢書張君莊舉拔萃遠方從者洋縣李進士正豔富平田孝廉懋勛皆以師先生發名家居二十餘年成就人材不可悉數而先生精力亦疲矣今上御極之元年銓授山東新城縣甫下車即以勘災救困培學校課農桑爲先務憶藻自乙丑報罷迂道新城入其境見嘉禾怒生民氣恬和詢之父

老僉曰數十年無此好官但恐遷調別處耳登其堂見訟庭花落
入其室子弟恭謹服用樸潔又宛然一寒素也與民接如家人父
子無一毫俗吏態始知先生處爲名儒出爲良吏真有合昔人以
賢得民以貴得民之意嗚呼誰謂邵父杜母不再見今日耶某官
三水聞先生兩登上考調單縣單古單父地嘗寓書問先生爲鳴
琴乎爲戴星乎答以戴星尙多廢事况鳴琴乎無何誣被吏議初
聞驚愕後得實始知先生蓋失於厚而心跡治行益昭白云甲午
予復改授廣西懷集縣乙未四月抵任明年七月遂卒於官嗚呼
惜哉先生窮且益堅貴而能勤通籍後歷官三處凡識先生者無
不得所沾潤而先生幾不能自存賢可知也先生生乾隆丙申十
一月八日終道光丙申七月九日年六十有一配張氏贈正七品
孺人生子一熙鼎早世次熙某側室李氏生嗣孫一恕道光十七

年某月日葬於某之新阡某山某向銘曰

能爲師能爲長理則一途無兩仕既優學不罔場築室祠繪像死猶生動人想

惰箴

楊樹椿
朝邑

平日之氣甚幾希也尙寐無覺晝可知也朽木糞土非我而誰也
鷄鳴不起雖蹠亦不能爲也危乎哉晏安酖毒不可懷也

夢箴

爾有邪夢人誰知之爾心不得而欺也且省焉則羞非爾之由惟
爾之由

話箴

悅人而發心則不誠矜己而發氣則不平請君自問爾胡不行富
鄭公云守口如瓶

酒箴

書酒誥詩賓筵古有訓法聖賢喪女儀亂女德籍與伶是爲賊天生女爲君子而自放於酒徒已焉哉鄙夫

虞廷劉君墓志銘

楊樹椿

丁卯之亂虞廷劉君攜家避南陽而求余亦攜家往其子曰孝哥十四歲矣余徒也且訂昏余弟之子而歿於賊君鬱邑成疾竟以同治戊辰三月十六日卒旅櫬煢煢父子相望數千里生死不相聞君父諱士貞母姚氏以道光丁亥五月四日生君於邑龍門里幼不妄嬉笑出爲堂叔父諱士秀後所後父母及庶母郭氏今守節者皆愛之如子召異母弟先庚同居爲娶妻初所後父歿南陽之業忽興訟君奔走千餘里往來州縣署訟得直時未弱冠也其德著家庭而才周事務如此性溫婉明慧整潔談笑從容貌清癯

若不勝衣而遇事執不可奪每以談言微中理一坐輒傾悔少之
不知學也博購程朱諸儒先書手鈔小學近思錄詩叶古韻易本
義復古本將自課且以教孝哥業未就緒而疾作矣在南陽病中
猶日令余講近思錄數條此可以見君志矣余與君生偕往而死
獨歸如是者時又有薛魯觀云君諱際唐字虞廷享年四十有二
娶薛氏生孝哥與一女先君卒今待孝哥三年未歸遂以辛未三
月七日返柩葬於里之東原新阡北首葬君者庶母也奠君者女
與弟也哭母者余與魯觀也君之身後伶仃淒涼如此悲夫銘曰
龍門之東原爽塏軒軒棲厥魂苞厥根天祚靈只弟後昆

爲族兄鳳升作母劉氏慈恩序

楊樹椿

母劉氏者從叔母也升生數歲喪母鞠於劉故母之不叔也因亦
子之不姪也母無子而慈惠又好勤苦其鞠升也飢食之寒衣之

疾病憂之如是者十餘年既授室猶弗置也升有姊二母皆女之
一如升而姊皆早逝升獨事母以終壬戌之亂母遷於蒲遂卒時
升以離亂莫在旁屬續前數日無日不叫升焉痛哉母昔與升同
院居後失明依嗣子鳳詔猶時時來升院今已矣卒之前二年患
萎不下床升以負販莫能常侍側而猶時往往必語移時今已矣
嗚呼生未盡養沒未面訣喪亂既平乃申禪祭製此軸書母恩亦
志吾哀也命族弟樹椿曰盍爲我歌之以侑享椿曰孝哉兄也可
以勸矣乃歌曰

陰雨兮黍苗兒成立兮母劬勞春車紡兮燈燼秋杵促兮月高目
不明兮身不起兒罪兮焉逃魂兮歸來戰馬蕭蕭去不回

神迎

河之刀兮蒲之坂送我母兮竟不返北原兮葬謁西郊兮賊滿感
霜露兮三年蒿萊除兮籩豆踐魂兮何嘗兒今醺酒又烹羊

神享

薪棘兮萎萱山律律兮雪漫漫天長兮地遠何處兮慈顏螟蛉兮
孤單北風急兮吹汝寒魂兮休去孤兒淚濕墓前樹

送神

與張備三說論語

楊樹椿

今人講程朱之學而不講孔門之學近看論語聖人教學者用功
無非篤實自得之事說忠信說孝弟說篤敬說貧富數端而已問
仁曰言訕問政曰先勞若今人則嫌不全必以立志居敬窮理反
身明德新民作題目也今人爲學似律家名例只於名上理會又
曰論語曰博學於文又曰多聞多見曰好古敏求問禮問官訪樂
與今之講小學近思錄四子謂將終身而不博觀經史者異矣

清處士先兄損齋先生楊君墓志銘

楊鳳詔

樹椿弟

先生諱樹椿字仁甫號損齋先世居華陰元末始遷朝邑西野鶴
村父諱廷藥母氏周嘉慶己卯十月十六日生自幼不凡弱冠失

卷一百一十一
六
怙治舉子業既列邑庠從遊李桐閣之門冀以祿奉菽水及壯先
妣亦棄養遂罷舉業絕意仕進居太華博覽經史百家豪邁自適
欲以詩文名世既與三原賀復齋芮城薛仁齋兩先生遊專讀濂
洛關閩書發憤爲聖賢之學刻厲實踐數十年如一日亦即以此
教人而信從者衆同治甲戌應邑侯黃公聘主講友仁書院先是
疾已作吳縣清卿吳公奏請蒙欽賜國子監學正銜拜命之日告
先祖讌宗戚從容歛洽拜跪如儀甫浹旬而竟不起時九月二十
日也前二日書遺訓未終手蹟宛然嗚呼痛哉年五十有六娶同
里石公長華女子一玉清業儒女一適大荔諸生成錦濤家計索
然賴親友門人賻幣始營壙卜以明年三月十二日葬於村北考
妣墓南舊山甲今向午不求當世文士銘還命也降服弟鳳詔泣
誌其生卒大概而繼以銘曰

嗚呼皇天不憖遺一老兮俾善吾鄉葬於北方北首兮伊古之常
神陟降以左右兮二親之旁予悲哀而莫訴兮中野徬徨願我有
賢子孫兮紹前烈而益光

兵部侍郎頭品頂戴山西巡撫張公墓志銘

薛允升

長安

公諱煦字靄如號南浦甘肅靈州人曾祖繼賢本生曾祖習賢祖
駿翮考松年舉人狄道學正妣氏王皆以公貴封贈如例公以道
光己酉拔貢舉鄉試成咸豐癸丑進士授刑部主事擢員外郎遷
郎中京察一等出爲貴州鎮遠府知府調貴陽府丁王太夫人憂
歸服闋補貴東道遷陝西按察使廣東布政使調山西擢陝西巡
撫調山西湖南光緒二十一年八月初十日以疾薨於位遺疏入
天子軫惜賜祭葬勅所司議卹如故事其孤體元贊元扶喪歸西
安將啟公配文夫人之厝卜地而合葬焉關中民間公薨咸巷哭

泊喪歸扶老攜幼相率弔祭願留公葬於陝嗚呼賢哉公起家儒
素服官郎署以經術讞獄當事知其能俾總司秋審公不懈益虔
緹幽剗隱如燭照數計吏讐囚服海內無冤獄其出守鎮遠也時
黔中大亂楚蜀道梗不克往官文恭公方以使相鎮畿輔諗公才
奏調入幕襄治軍書悉中竅要直隸肅清黔寇亦稍燼遂奉母之
官屬鎮遠尙爲賊踞大吏檄公權思南思南故無城距城四十里
有荆竹園者箐深林密爲賊窟穴時時伺便出焚掠冀犯郡治公
部分壯丁授之方畧分守要害乘便出擊輒得勝賊黨或受公鈞
致反爲我用遂以平賊黔在西南萬山中瘠苦爲天下最兵事甫
定悍苗驕卒良莠麇處民志懍懍公旣蒞首郡掃地而立嚴緝捕
以詰奸覈密保甲以安良懦機牙四張姦宄惕息迨分巡貴東一
如其治郡時天子亦稍稍知公才將大用矣其按察陝西也蒲城

有楊孝子者母爲仇毆墮其妊死叔某救之亦死孝子幼而貧欲復仇蔑爲申理畜匕首十餘年卒得仇手刃之詣官自首承審者苟欲結案弗深察以故殺擬抵刑有日矣公視事廉得其冤出之獄方是時楊孝子之名震都下鄉民益感泣頌神明也十一年太原汾水溢入城壞民居無數公至則慎選官紳籌賑築堤惠得下究流氓用鳩其開府吾秦也三輔自寇盜擾攘之後繼以大祲公私凋瘵府藏支絀顧官吏習爲華侈誅求無藝民氣日弊公滌除封靡綜核名實革除陋規上下肅然科場供應爲百餘年積弊奏請裁革商民快之及移撫湖南攀轅泣送者數百里不絕三湘號難治甲諸行省公不動聲色消患未萌閭閻安堵蓋自海禁大開疆場之事日益以瘁一二慷慨激發之士平時務爲恢張以破除故常顧疏於民事民亦不獲其利逮時勢艱阻俛首無濟然後思

公之廉靜慤實不爲赫赫之名者猶足以得人心而集事也長沙地庫濕益以積勞遂得臂疾疏請開缺上重惜公去乃量移山右甫下車邊外大旱地千里赤民死亡畧盡公竭力籌撫轉粟數千里經萬山以餽饑黎事甫定而遼禍亟海內騷公選士厲兵勗以忠義俾入援畿輔外籌供億內庠吏職不遑寢食迨和議告成公疾深矣會言事者微及公上知公深特詔入覲以塞羣疑既至召對數四恩禮有加命還任公感激知遇誓以身報遂致不起烏乎哀哉公生於道光二年七月初二日春秋七十有四配文夫人先卒側室章子二體元候選郎中贊元女三長適吏部主事昆明錢需珊次適泰安府知府安定康枚三適貴州通判會稽梁長生體元及三女文夫人出贊元章出孫二柄二品廕生權今卜吉光緒二十四年二月某日葬公於咸甯之鳳棲原卯首酉趾體元等